

臺灣外記卷之二十六

施提督連疏議剿

姚部院遣使再撫



康熙二十一年壬戌

附稱水曆三十一季

正月劉國軒以澎湖重地恐

乘新春宵小不測有變遂辭克塽初三日領載糧餉竝大隊

揚帆出守澎湖二月施琅以渡海東征出於乘機便可進取

苟事事欲馳會督撫恐失其時遂密請專征疏曰

為密陳航剿海務機宜以收萬全事竊照臣駑駘庸才繆

荷我

皇上特恩起用以臣深知水性賊情專界進剿海逆之責臣

思滇黔弄兵悉皆底定惟有臺灣四十餘年殘孽逋誅未

殲致墮

聖懷臣敢不殫心籌畫滅此朝食受事以來練兵整船靡敢刻懈業已就緒然用兵之法不得不熟審詳慎卽古者行兵多用奇計聲東擊西兵不厭詐非可直道而行去冬具疏展限請以今年三四月乘北風進兵蓋爲逆奸細頗多使賊知我舟師必用北風而進然後出其不意而攻之臣在在密用間諜亂其黨羽自相猜忌自去年逆艘糾集澎湖欲抗我師據險以逸待勞設我舟師到彼必由澎湖西嶼頭然後轉帆向東北而進正值春夏之交東北風爲多我船盡是頂風頂流斷難逆進賊已先站立於外塹內塹

接應娘媽宮俱是居我上風上流禦敵其難衝擊勝故不可不慮及此也所以前議北風之候猶恐未能萬全且水道行兵專賴風信潮水非比陸路任意驅馳可以定計進止臣日夜焦心熟籌莫如就夏至南風當令連旬盛發從銅山開駕順風坐浪船得連踪齊行兵無暈眩之患深有得於天時地利人和之全備使賊縱有狡謀斯時反居下風下流進不得戰退不得守澎湖旣得便知賊勢虛實直取臺灣使可克奏膚功倘逆孽退守臺灣死據叟口我師暫屯澎湖拒其吭拊其背逼近巢穴使其不戰自潰內謀有應不然俟至十月乘小陽春時候大舉進剿立見蕩平

此乃料敵制勝所當詳細一一披陳者也然臣竊有請者督臣姚啓聖調兵製器獎勵士卒精敏整暇咄嗟立辦捐造船隻無所不備矢志滅賊國爾忘身堅圖報稱非臣所能力止惟是生長北方雖有經緯全才汪洋巨浪之中總非所長矧撫臣吳興祚陞任新撫臣初到視事恐未悉閩疆情形臣之鯁鯁謂督臣宜駐廈門居中節制別有調遣臣得專統前進行間將士知有督臣後攢糧運策愚則糧無匱乏之患兵有爭先之勇壯志勝於數萬甲兵若令臣偕行征糧何以催趨封疆何有仰賴安內攘外非督臣斷難彈壓緩急臣故密疏入

告使督臣聞知必以臣阻其滿腔忠藎仰冀

皇上密行

溫諭督臣免其躬親偕行今臣同督臣操練水陸精銳官兵充足三萬分配戰艦儘可破賊但臣僅掌有水師提督印信未奉有征剿臺灣之

勅諭伏望迅賜頒發以副轉睫師期俾得申嚴號令用以節制調度所有督臣題定功罪賞格賜臣循例而行則大小將士咸皆凜遵至於師中參酌見有同安總兵官吳英智勇兼優竭力自許可以爲臣之副尤望

恩嘉獎勵又有興化總兵官臣林承金門總兵官臣陳龍平

陽總兵官臣朱天貴海壇總兵官臣林賢雷閩候補總兵官臣陳昌江東副將臣詹六奇隨征左都督臣李日垔等俱堪衝風破浪勇敢克敵共勦搗巢藉我

皇上天威丕著醜類遊魂何難殄殲航剿滅賊關係臣之一身承當責任何等綦重以故凡賊之形勢風之順逆事之區畫亟當十分詳審以圖萬全况出汪洋大海之外匪敢輕舉妄動苟且從事致負眷顧之隆臣當會商將軍合詞具

題而將軍海務情形非所諳曉又恐奸細窺探漏洩是以自將戰畧師期密疏上

聞仰聽

睿鑑三月初一日到京投進畱中

十五日丑時臺灣忽滿天昏暗有白氣三條從西北直貫東南十八日丑刻又如前昏暗白氣從東南起貫及西北出汛鷄籠山諸軍士大發疾病五月施琅見船隻齊備遂咨請喇哈達姚啓聖至銅山欲乘南風當令進取澎湖啓聖曰南風輕軟候北風方可出師琅曰南風雖軟在於銅山放洋居於上風上流我舟師可得成艖兵士又無暈眩之苦勢如摧枯拉朽啓聖曰劉國軒久年積寇詭計甚多我師欲據上流上風安知彼不以上風上流而來迎戰乎互相爭執喇哈達勸

日平海事關重大奉

旨督提同心豈可各執己見當請展限以候進取琅不得已聽啓聖主稟展限琅曰如此相制海寇何日得平邊民何日得安無奈仍操演待時鷄籠山因有重兵鎮守故起沿途土番擊送糧食土番素不能挑悉是背負頭頂軍令繁難不論老幼男婦咸出供役以致失時况土番計口耕種家無餘蓄而枵腹趨公情已不堪又遭督運鞭撻遂相率殺各社通事搶奪糧餉竹塹新港等社皆應之埭聞報詢錫范范舉其左協理陳鋒督率將士與宣毅前鎮葉明右武衛左協廖進等督兵征剿但土番性情輕佻男婦成行所用鏢鎗而已各社

各黨無專主之人約束故不敢大敵只於夜間如蛇行綸營

冲突一聞進剿各挈家遁入深山吏官洪磊啓陳其畧曰土番之變情出無奈苟專用威則深山藏匿難搗其巢穴當柔以惠則懷德遠來善撫而駕馭之况當邦家有事之

秋豈宜震動伏冀遣員招撫云云

克塽允從遣各社通事往招並令葉明等進兵谷口撫剿外用通事雖奉令入山說之奈土番各樹黨羽俱不信其說每突出谷口擄掠明於各隘口樹柵日則帶銃手巡哨攻打設備困之土番伏則無糧可食出則咸被截殺計窮乞降明轉啓克塽克塽允之再令通事入山領其衆仍回原社耕種然後

五

求無不獲齋

班師七月十一日施琅按邸報讀將軍喇哈達疏內有提督稱南風不如北風之句駭然曰此說何因急當密告十三日遂上疏曰

爲欲靖海逆根株全在

嚴旨決計進剿以收實效事竊惟我

皇上御極以來宇宙廓清無思不服惟鄭逆抗拒橫行深費

皇上宵旰南顧之憂臣竝復荷

聖恩起用重臣以水師提督之任責臣平臺逆之患兼面奉

天誥溫諭諄諄剿滅臺灣以免生靈塗炭何等嚴切故銜

命以來兼程疾趨卽于去歲十月初六日抵廈門視事點驗

船兵全無頭緒焉敢妄舉進剿時欲具疏入

告恐傷寅恭和衷故日以繼夜廢忘寢食一面整船一面練

兵兼工製造器械躬親挑選整頓至今年四月終方稱船

堅兵練事事全備移請寧海將軍臣喇哈達侍郎臣吳努

春到廈門看閱此時將士摩拳擦掌人心思奮將軍二臣

交口稱贊不已臣卽于五月初三日會同督臣姚啓聖統

率舟師開駕至銅山以俟夏至南風當令聯船進發第督

臣以五月初一日准部咨進剿海賊關係重大之

旨隨轉意不前而三軍側聽一盡解體臣自初七日起與督

臣決計進取力爭十餘天至十六日將軍二臣抵銅山到

臣營所臣面懇將軍轉勸督臣乘南風進剿無不摧枯拉朽之勢奈督臣終執

旨意以督提同心合意爲辭臣不便違抗姑聽督臣主疏展期實非臣之本意此二將軍臣親到銅山所目擊而共悉臣衷也本月初七日承准兵部劄付內開寧海將軍喇哈達等疏稱總督提督稱南風不如北風臣深爲駭異切思臣當日在銅山與將軍二臣竝無言及南風不如北風之語日與督臣爭執南風進剿不惟三軍皆悉其情卽通省士庶亦皆俱曉且督臣日遣各總兵海道勸臣權依督臣之議今將軍二臣具疏竟不分皙明白一筆混入陷片推

執不前若非

皇上寬置不究則臣先後疏章自相矛盾欺誑

君父罪當萬死矣夫南風之信風輕浪平將士無暈眩之患且居上風上流勢如破竹豈不一鼓而收全勝臣見督臣堅意難以挽回故聊遣趕繒快船三十二隻令隨征總兵臣董義投誠總兵臣曾成提標署左營遊擊事臣阮欽爲併各鎮千把等官領駕前往澎湖瞭探賊息據其回稱義等奉令領駕于六月初四日午刻從古雷洲開船至初五日未時到澎湖貓嶼時船未便徑進花嶼前澳泊至於初六日黎明率各船由虎井過西嶼頭瞭見劉國軒賊艘盡



賊俱泊娘媽宮賊見我船大船槩起頭帆小船盡起大帆賊遂出趕緝三十餘隻駕出西嶼頭又有八罩賊船十餘隻由南面而來我船恐衆寡不敵本日未時傳炮收回各船歸艚初七日到大担初八日到廈門港歸汛等情據此則此行遣巡哨船隻來去無阻見有明據矣若決乘南風進攻豈不可見成效乎業將瞭探情由遂已咨報將軍二臣併督臣知照在案乃坐堂筆帖式譚木哈圖具題大兵水面度日逆賊探望空隙之疏殊非眞知灼見爲証臣全不解其故然臣生長海濱總角從戎風波險阻素所履歷且荷

簡命前任水師提督閱歷至今豈有海面形勢風信水性猶不暢熟胸中而筆帖式乃更識於臣乎蓋賊中情形臣有屢得舊時部曲密寄通報有稱臺灣人心惶惑無定兼以劉國軒恃威妄殺稍有嫌隙全家屠戮人人思危芒刺在背間有慕義內應奈隔絕海洋難以朝呼夕應豈敢公然謀舉此便是可破可剽之機又此六月二十八日巡守海口兵丁遞送澎湖長髮賊柳長勝林斗二人赴臣軍前投誠詢據林斗等供稱原坐杉板頭船過來投誠澎湖新舊煩船烏船趕緝船雙帆船各船共有一百二十隻劉國軒林陞江勝等共計賊衆六千餘內有家眷舊賊約二千餘

名其餘俱係無眷口新附之衆私相偶語提督不嗜殺人  
只等大軍到便瓦解歸順有偽蕭一鎮下將領謀議候出  
娘媽宮操船乘勢駕船過來投誠被其知覺登時殺其頭  
目九人因探聞我兵船自銅撤師回汛彼故調賊二千餘  
名回臺耕種以作糧食今止留賊四千名在澎湖配船防  
守等語據此則賊中虛實又以得其詳矣且臣更以賊中  
之情形言之昔之偽鎮營蟻附脅從皆受鄭成功鄭經父  
子結恩舊人籠絡相依今劉國軒舛戾操權動輒殺戮以  
威制人誰肯甘爲凡肉是我舟師未到澎湖權猶在劉國  
軒一人之主持我舟師若抵澎湖勢難遏各鎮僞卒之變

亂則踞守澎湖逆賊縱有萬餘內多思叛馳萬心之衆以  
抗我精練勇往之師何足比數雖劉國軒輕命死敵于人  
猜忌之際靡有不潰則可破可剿之機又無如乎是今我  
皇上若以俟有可破可剿之時

溫旨下頒則汪洋巨浪之中誰肯效命七尺之軀而殫力三  
窟之險勢必藉

旨意爲居奇遷延歲月虛糜浩費所謂築室道旁三年不成  
是賊終無可剿可破之日矣矧夫按兵不動若以撫諭劉  
國軒沐猴鴟張操縱自若志得意滿斷無輸誠向化之念  
雖其中僞鎮營賊衆有心歸正奈銅山嚴密一船不許出

港雖有謀叛隱情亦難通報故非聯絡進發疾行撲擊安有自甘獻俘坐待賊亡竟在何時在督臣滅賊之念實切惜乎生長北方水性海務非有所長登舟之際混心嘔吐身體惟艱所以前疏懇留督臣居中調度蓋爲此也中有一二視此畏途未免低迴以致督臣疑惑不決臣雖庸愚料敵頗效前于康熙二年間海逆猖獗

皇上特差兵部郎中黨到閩問臣機宜當即決意攻廈門時督臣李率泰亦以臣過於擔當然兩島竟爲臣克平旋於康熙六年十一月爲邊患宜靖逆賊難容等事具題未奉俞旨乃使逆孽于甲寅年有燎原之變今鄭經雖死留此餘

黨負踞絕島臣丁卯年六十有二血氣未衰尙堪報稱今不使臣乘機撲滅再加數年將老無能爲後更恐無擔當之臣敢有渡海滅賊之任是以臣鯁鯁必滅此朝食惟是臺灣殘孽未滅故設許多鎮營官兵糜費錢糧貽累生民所設水師鎮營原爲航海搗巢之用今就中挑選精兵二萬有奇大小戰船三百號儘堪破賊可以無用陸師倘相牽制卒難成功若陸師之中間有勇敢効忠熟練海務能將容臣調選一二以爲臂指共勤大舉之卽伏思臣累受國恩奉召晉京師寵擢內大臣之列豢養十餘載今復謬荷起用寸功未效又叨更晉官銜特賜

御膳金榻亘古未有受

君恩如是也卽赴湯蹈火臣志所不辭倘荷

皇上信臣愚忠獨任臣以討賊令督撫二臣催趨糧餉接應

俾臣整頓官兵時常在海操演勿限時日風利可行臣卽

督發進取出其不意攻其無備何難一鼓而行事若不效

治臣之罪臣樸質武夫一片圖報微忱惟知欽遵

天語煌煌責臣必破臺灣克奏膚功臣以

君命爲重故當克盡臣節不禁煩瑣激切瀝陳斷無浮言飾

辭冒昧於

君父之前伏乞

皇上睿鑑俯將臣疏畱中

大賜乾斷決策

嚴旨速命事必見效民生幸甚封疆幸甚緣係密陳欲靖海

逆根株事理字多逾格貼黃難盡伏乞

寬恩全覽施行爲此具本謹密陳請

旨十五夜四更臺灣慧星再見於甲卯方至二十夜不滅八

月初一日申刻復現於西方光芒指北至初五日西刻芒又

轉指東方初十夜二更大小星數百墜下鷄籠山不日守將

總兵鄭仁沈誠副將黃明等病沒其弁兵士死者過半九月

初一日施琅統五營官兵船隻就廈門開駕至泉州海口臭

塗寄泊操演又咨檄海壇金門銅山興化各總兵協鎮營將以及聯絡趕繒等船至平海衛會齊進剿十月二十日施琅在平海接

旨有進剿海逆關係緊要著該督提等同心協力催趲糧餉勿致遲誤前姚啓聖具題功罪定例交與施琅遵行二十八日又接

旨若有可行機會提督施琅等應遵前

旨統伊所派船兵毋失機會而行可也琅連接

旨意進剿權威歸己遂咨請啓聖剿撫事宜以便主決啓聖覆以賊之果否誠心投誠難以逆料未便遽行遣官往撫俟

有機會之文琅笑曰遣撫既不敢逆料懸揣豈可虛糜錢糧則當決計進剿但平海一澳土地荒蕪所有井泉俱被冲壞惟剩一井又淤淺鹽澀兵士雲集取水惟艱琅思昔日耿恭拜井尙得甘泉今我奉

天子命平海以救生靈當效恭禱告琅遂虔誠禱祝畢令軍士將井淘淨而泉水突湧嘗之其味清甘日夜挑汲不竭三軍是賴勒石名其井曰師泉贊曰

海島已無泉 三軍幾斷烟 貞誠虔拜禱 汲引任回旋

十一月琅因北風太硬未敢進剿令各鎮協營暫歸汛自統船回廈十二月啓聖以琅未敢渡海查與劉國軒有舊好者

革職副將黃朝用卽差往臺灣招撫許其不削髮只稱臣納貢照高麗朝鮮事例至澎湖見國軒軒轉送過臺其馮錫范陳繩武總特波濤議未定軒偵知琅撤兵各歸原汛二十六日亦回臺灣

卷二十六終

臺灣外記卷之二十七

克塽信讒斂百姓

藍理負傷攻澎湖

康熙二十二年癸亥

附稱永曆三十七年

正月黃朝用見國軒錫范等

猶豫無意投誠連日辭回劉國軒啓克塽和議大事當遣能員入省報命洪磊舉天興知州林良瑞材堪爲使塽加瑞總兵改名林珩同黃學黃朝用往福州見啓聖國軒囑珩密探船隻虛實珩二十五日舟次遼羅令快哨入廈報施琅欲進見琅卻之二月初一日黃朝用等船泊惠安縣獺窟澳馳報啓聖聖令黃朝用同林珩等馳驛初八日到福州見啓聖聖與喇哈達金鉉禮待珩會疏馳報外另知會施琅遵剿撫之

旨以撫爲善策琅覆以奉

旨專征撫不敢主如果有真誠向化當必遵制削髮啓聖等亦未能決惟暫留林珩于貢院十三日劉國軒辭克塽仍到澎湖調度防禦但啓聖欲撫而琅欲剿兩議未合啓聖遂送黃學林珩二人回臺四月十六日澎湖狂風暴雨濤湧翻天次日波息浪恬一魚長二丈餘四尺身上鱗甲金色邊有火焰奪目從海登陸兵民見而異之國軒率諸鎮暨澎湖安撫司陳謨等各燒獻冥寶紙錢金鼓送之下水越三日乘夜登山死於百姓林英之廚下天明報國軒軒令瘞之

按成功踞金廈震動濱海有問黃檗寺隱元禪師曰成

功是何星宿投胎元曰東海長鯨也再問何時得滅元

曰歸東卽逝辛丑成功攻臺紅毛望見一人峨冠博帶

騎鯨魚從鹿耳門遊漾而入後功諸船果從是港進癸

卯年四月間功未病時有副將楊明夢成功冠帶騎鯨

魚由鯤身之東出於外海覺而大異與人述之不數日

而成功卒正符隱元歸東卽逝之言

按隱元住黃檗寺德行精修曾遣其首座過日本國至

港口舟覆而死越歲元往將至港口夢首座來迎次日

風浪大作羣魚千萬船衆咸恐慄共請于元元曰毋慮

令侍者出紙筆書免朝二字于水仙門焚之頃風息而

魚散元居日本國中人奉如活佛

五月施琅以平海甘泉之湧臺灣可收之兆是天之將亡鄭氏宜乘機進剿不可違時送密題疏曰

爲海逆形勢將滅不可少寬自解賊危事竊惟臣奉

命專征調集舟師俟機進發總期必滅此賊而後已茲正月十六日准督臣姚啓聖送到會題疏稟爲選將挑船安頓上風等事內開選其善識水性勇往敢戰挑趕船六十隻佔踞上風灣泊出其不意直鼓奮擊俾其驚疑莫定則洋販無資糗糧不急一二年間剿撫皆宜等因到臣臣聞之不解其意督臣凡所有會同章疏未嘗移稟議定先已

列名入

告然後知會故臣不得不瀝陳緣由照臺灣逆孽情形臣籌度之甚悉自去年出海至十一月杪各官兵船隻方得齊集平海衛澳取給糧餉僅領至十二月止惟官兵渡海應得俸餉必須預備隨帶臣在平海舟師時駕出洋操演若風可進卽直取澎湖若風未便則仍獲收回故于十二月二十三日出洋忽轉東南風乃止二十七日開駕至青水沿風輕又轉東南順風再收平海雖未及直抵使官兵屢涉汪洋之中衝風顛浪愈練愜熟賊聞知亦自驚惶不暇蓋大鯨之船必藉風勢順利自可直搗賊境始克成功若



風勢未順零星不齊何能協力撲剿茲於正月初七日據臣署左營中軍守備黃復謙報稱初二夜有原僞將劉秉忠等在澎湖擊眷八十二名口駕雙帆船一隻前來廈門投誠等情據此隨于正月十二日准同安鎮臣吳英咨送劉秉忠等到臣詢問據供去年五月間劉國軒知我師往銅山東南風進發甚是驚慌莫措後偵知撤回歸汛劉國軒乃放心自回臺灣料理要口將大小戰艘百號賊眾七千餘名交鎮將林陞陳諒等現在澎湖扼守賊中人人思危多有離叛之心口依在案臣于本日隨將劉秉忠洪貴二名轉送督撫二臣查訊去後今督臣疏稱欲改炮船為

洋販聚眾為耕種請挑趕總船六十隻南北灣泊一二年間自然困疲剿撫皆宜臣不解督臣如此主持不定似非善策臣今日水師齊集在海操演以制賊眾譬若人有焉扼其吭氣將垂絕一為之稍鬆則其氣舒而復起矧以六十船之南北灣泊北風平海可灣南風則將軍澳林景嶼豈可灣泊之處乎臣之操演所以俟機俟風進發又屢奉溫旨進剿海逆關係重大臣所統官兵二萬有奇大小戰船二百餘號責任甚重大艤舟師渡海宜慎不得不籌出萬全豈敢輕舉妄動又水師在海操演皆出本分行坐均各給糧船兵又無額外添設之費總以賊一日未滅則臣一

日未安且此賊伎倆臣熟籌深算力任剿滅矢志不移寧敢有片語虛飾於

君父之前而督臣止欲仗趕繒船六十隻可爲困疲賊勢誠恐一二年後復張聲勢其費力尤甚臣素知海逆始終虛實初時猶然疥癬皆因彼時當道泛忽姑息不亟攻治養成癰疽潰壞負抗四十餘載荼毒數省致煩

聖慮屢動大兵征討糜餉不計今若再一寬縱又踏前轍故臣惟俟風信之便順必無不破之理斷不復遺此賊以厯宸衷緣係密題海逆形勢事理貼黃難盡伏乞

皇上全覽乾斷勅部議覆施行爲此具奏謹密題請

旨

劉國軒安設澎湖各島停當集諸將商議戰守之策林陞江勝邱輝吳潛等皆願竭力死守第患糧餉不足耳軒遂公同啓克塽下六官會議錫范曰有土便有財再勻派百姓車稅毛丁等類國軒聞之卽飛啓云

當今百凡皆出民間五穀不登米價騰貴百姓困苦極矣若再爲搜括恐人心搖動則外侮立至須出內帑或捐助庶可萬全啓上

克塽示錫范范曰兵原以衛民民自應養兵今內帑空虛百僚蕭條不取之民將何所出鄭聰亦以范之言爲是克塽不

能主決拱手唯唯而已上淡水通事李滄獻策取金裕國安撫司林雲爲之轉啓克塽令錫范問滄取金情由滄曰從上淡水坐番邦小船蚊甲向東而行行至方浪石灣轉北而南溯溪直進此水路也可取金沙陸路當從卑南覓社而入內有強梁土番攔阻須整師列隊護而前行方可范允其議啓塽塽令監紀陳福宣毅前鎮葉明統所部護衛取金明等至卑南覓社見土番刺身籬肚硬弓操鎗扼險以守不得前進卽驅其土魁繞別路到力踞社連殺數人亦不肯指其出金之處無奈引還鄭聰與智明等牙爪顏臨李郡李靜橫爲肆虐道路側目禮官都吏林敷地見百姓不堪上啓有曰

顏臨力能回天道路側目李郡奸能惑主匪訛必報李靜財足通神犯之必死等語

克塽批與錫范審報雖諸公子關情懲倣各斂跡百姓稍安五月十一十二兩夜臺灣有大星四五箇從西北墜下又有無數小星隨之二十八日大雨傾盆至六月初六日方晴山川崩裂溪澗冲陷田園悉爲沙壓萬年州瀨口地方突有水牛一隻冒雨奔下海漾過三鯤身登陸由安平鎮過海又從柴橋頭再跳下海向大港出而死姚啓聖與施琅各執剿撫萬正色陳三條亦云當撫同啓聖各疏有云

一日十年生聚十年教養况於數十年之積寇乎二曰汪

洋萬頃之隔波濤不測之險三日彼船隻堅牢水務精熟之語

琅見主撫者衆遂密陳可取疏曰

爲海逆有日蹙之勢航船有可破之機密陳情形仰祈

睿鑑事竊惟臣奉

命征討臺灣於康熙二十年十月初六日抵任以來一面整頓船兵相機掃蕩竝遣心腹三四人漸次密往臺灣澎湖賊中通達臣之舊部在彼現爲鎮營管兵令其就中謀叛取事自去年亦有通信數次俟大兵臨境之時方敢內亂倒戈迎降者衆至今年正月初二日有僞副將劉秉忠等

坐雙帆船一隻帶眷口八十三名在澎湖前來投誠正月二十二日僞總理李瑞等奪民船一隻帶兵二十一名亦自澎湖前來投誠三月十一日有僞兵許福等十四名駕小船一隻自臺灣猴樹港前來投誠帶有臣前所差之人要緊潛通內有叛亂相應消息竝稱彼處米貴每担價銀五六兩七社土番倡反形勢甚蹙人人思危此乃天心厭亂明矣臣前差之人尙在臺灣謀結黨類以待內應其許福等臣只移督撫前來投誠之辭不敢直言恐洩事機將人現收軍中養活又三月十六日有僞民許六吳阿三等奪漁船一隻在澎湖帶眷一十九名口前來投誠四月

初三日有海賊鄭才等一十八名于四月初一日從淡水港奪破柴民船一隻前來投誠是此賊中今日之形勢滅在旦夕雖劉國軒復差偽官黃學林珩再來言撫致書一封求見于臣臣卻之不見令其自赴督臣轅門主議以么麼海賊非可視爲敵國我以彼爲輸誠彼直以我爲和議徒褻

國體藉此妄稱祇安賊心臣惟遵奉

命搗巢滅逆爲念議撫之事臣不敢預及今臣在水陸官兵中超選二萬有奇操練有日可稱精熟足以破賊攻澎湖宜水兵破臺灣則當用陸兵也但糧最宜預備給足以鼓

士氣乘夏至南風當令當卽進發搗剿蓋北風剛硬驟發驟息靡常難以逆料南風柔和波浪頗恬故用南風破賊甚爲穩當臣大膽舟師航海責任綦重自當相機度勢期出萬全以仰慰

皇上宵旰之懷臣每自思維膺軍旅之任者必虛張賊之聲勢乃表見己之大功愚性慙直荷

皇上面諭諄諄從不敢一字粧飾白干欺誑緣係密陳海逆可破之機其中所有來稟關係機密只畧陳其槩貼黃難盡伏乞

皇上睿鑑全覽留中勿發恐剿撫之議不相入或有漏洩以

害成也爲此具本謹密題達

六月施琅將大隊舟師齊集銅山竝請姚啓聖至共商給發糧餉及犒賞銀兩十一日琅大會各鎮協營守備千把隨征諸官將先鋒銀錠排列傳令征剿澎湖誰敢爲先鋒者領取以便首先冲鋒破敵遍示諸將未有出應獨提標署右營遊擊藍理挺身出領先鋒銀錠琅允許十三日祭江十四日辰時琅統諸船從銅山出師東征於是晚卽放洋劉國軒雖各島築臺提防每與諸將論六月風波不測施琅是慣熟海務者豈敢故犯突然興師乎不過虛張聲勢如甲辰年出船復旨請寬限而已忽十五日辰時八罩巡哨船瞭見青水沿一

派帆船如葉順風直向澎湖來想係施琅舟師隨飛報國軒軒駭然忙差領兵吳畧持令箭與右先鋒鎮陳諒著其嚴督陸路諸將謹守遍傳守獅嶼頭戎旗一鎮吳潛守風櫃尾平北將軍果毅中鎮楊德守鷄籠山遊兵鎮陳明同中提督前鎮黃球守四角山果毅後鎮吳祿同侍衛後鎮顏國祥分守內塹壁宿鎮楊章同右先鋒鎮領兵李錫分守外塹右虎衛鎮兵江高侍衛彈忠營王鯉守東時後提督中鎮張顯守忠瀉前鋒鎮黃顯等各移大炮大煩羅列海岸橫截攻打勿使彼得灣泊寄椗又傳集水師總提調右武衛林陞督征北將軍曾瑞定北將軍王順左虎衛江勝援剿後鎮陳起明宣毅

左鎮邱輝護衛左鎮黃聯後勁鎮劉明折衝左鎮林順斗宿  
鎮施廷中提督中鎮洪邦柱中提督右鎮尤俊中提督後鎮  
楊文炳提督前鎮陳旭中提督左鎮李廷桂水師一鎮蕭武  
水師二鎮陳政水師三鎮薛衡水師四鎮黃國柱等諸鎮營  
督駕大煩船鳥船趕繒船環泊娘媽宮前口子並內外塹東  
西時各要口守候邱輝向前請曰乘彼船初到安澳未定兵  
心尚搖輝願領煩船十隻同左虎江勝前去冲殺建威中鎮  
黃良驥曰宣毅左鎮邱輝此論正合兵法先發制人半渡而  
擊也國軒曰炮臺處處謹守無處灣泊當此六月時候一旦  
風起則彼何所容身此乃以逸待勞不戰而可收功也諸公

勿慮輝等快怵而退琅統侍衛吳啓簡吳英朱天貴林賢楊  
嘉瑞陳昌等各鎮營船隻至申時方到澎湖地方即令快哨  
前去探望回報各島悉有船隻把守炮臺相望惟猫嶼飛嶼  
八罩水安澳賊船無幾琅發令天色將晚所有船隻分踪暫  
寄猫嶼花嶼諸澳水師二鎮前鋒營李富同防守猫嶼中提  
督中鎮左營王顯守水安澳左虎衛領旗協楊武見琅大隊  
舟師將至寡眾不敵隨將船駕回娘媽宮報國軒軒知琅船  
到邱輝復挺身請曰俟今晚潮落冲踪攻擊自然潰散不可  
使彼窺探而料戰軒笑曰公堪稱勇將竭力報國但我自有  
成算施琅徒有虛名耳令當此日日颺報之朝敢統舟師越

海征戰遂即發令馳告各守把要口提防如夜半風起則彼無焦類矣次早十六日琅督舟師齊到澎湖國軒坐快哨如飛于媽祖宮前澳內督諸鎮迎敵林陞江勝邱輝曾瑞王順陳啓明楊文炳等將煩船戰船趕繒船排列攻打我舟師鎮營各欲爭先互相衝撞不得前會潮落風不順邱輝江勝首爭追擊遂少怯而退適琅船被流挽下兼遇頂風林陞率前鋒鎮姚朝玉智武鎮陳侃戎旗五鎮陳時雨與林順施廷洪邦柱等船結大隊合攻琅琅正在尾樓上督兵禦敵忽流炮過餘燄燒著琅右面跌倒諸將大驚琅曰無虞火氣強起指揮提標署右營遊擊藍理望見琅船受困將自坐戰船逐浪

冲鯨高叫曰將軍勿憂藍理在此遂發斗頭煩攻穿陳侃船一隻登時沈沒又發左邊橫炮一門攻中提督前鋒鎮陳營船壞裂半邊理入鯨督衆揮擲火罐陳時雨船發火咸赴水死故諸船稍退琅令船衆擊檣畧進風微起正轉帆行亦發右邊橫炮攻中侍衛右協蔡智船折頭桅方與理合鯨攻打打壞姚朝玉船一隻林陞不肯退揮諸船與理死戰理正酣戰爲流炮餘燄所傷掩身甲燒透及腹跌倒肉裂見腸其裨將等忙舍戰救理搖手曰不妨令其仲弟瑤督戰速進莫因我一人而誤大事衆急取藥敷腹裂旗幅緊裹理起整甲奮呼曰今日諸君不可怯戰誓與賊無生還戰愈酣陞身連



中三箭終不退忽左腿被理炮所傷遂倒船方散開琅乘勢  
趕入適江勝邱輝督煩船復合琅與理等引師還退出外洋  
國軒望見琅舟師已退而江勝邱輝揮船尾追恐其貪敵遂  
鳴金打招旗二人聞收金亦即轉船仍回娘媽宮前口子下  
棹各坐杉板見國軒曰正欲乘勢追趕何本督鳴金之速也  
軒曰彼船隻衆多我恐汝二人貪敵倘有別隊舟師乘虛而  
入豈不欲巧反拙是以收金輝又曰乘彼戰北軍心必虛輝  
與左虎今夜督煩船十隻直抵貓嶼花嶼八罩攻打料彼必  
不自安決然逃回軒曰今日已挫其銳氣不必追趕但謹守  
門戶以逸待勞彼船許多所寄泊安嶼悉無遮攔之澳咸是

石淺蕪綫早晚風起定不戰而自潰輝曰兵法有云半渡可  
擊立營未定可擊乘虛可擊今敵人患此三忌而不乘勢趕  
殺若早晚無風合萬人一心而死戰將奈何軒曰子多慮焉  
俗云六月三十日有三十六暴今日乃十六明日十七十八  
九就是觀音暴洗蒸籠暴安有無風之理暫且養精蓄銳拒  
險守隘以觀其敗隨撥蔡明船載右武衛林陞回臺調理炮  
傷兼報大捷輝勝等雖不敢違令但怏怏而退琅到洋中聞  
國軒鳴金收船歸艖嘆曰何狡獪若是正欲賺散其船出奇  
兵以旁邊冲入直搗其穴豈期其收軍也天將晚琅發炮將  
大隊舟師收寄西嶼頭各照艖暫泊浮棹不許卸甲弓上弦

炮入子另馳令著配坐一號先鋒大煩船金門鎮左營千總游觀光守把中路要口

按光字用賓漳浦人以克澎臺功官粵東虎門頭副將海壇鎮中營遊擊許英配坐二號大煩船守把左路要口同安營右哨千總林鳳配坐三號大煩船守把右路要口

按鳳字岐山南靖人以克澎臺功官北直蔚州參將以防劉國軒夜間乘潮冲出十七日琅號令全躲仍收八單水安澳諸嶼方傳諸鎮協營將千備隨征等官到中軍船議事吳啓爵吳英林賢朱天貴楊嘉瑞陳昌陳龍何義陳蟒林實詹六奇等齊到琅曰賊船無幾爾等俱不協力向前互相

觀望延至潮落使彼縱志攻擊若非監理本軍門豈不危哉令筆帖式常在將 欽頒功罪格填明賞監理銀二千兩游觀光等銀一千兩餘照有功有傷者輕重分賞撥船載監理等官兵帶傷回廈調理次將詹六奇方卻許應麟葛永芳方永劉管蔡斌等官一十二員細縛請 王令以臨陣退縮斬首示衆吳啓爵等七人向琅請曰昨日之怯亦由我們船隻雜各欲爭先以致互相冲撞使賊得以肆志用炮攻打非諸將故違 軍令今在用人之際求寬其罪令彼等立功琅曰賢罰乃 朝廷法令本軍門安敢自私英等復懇之曰賞罰固出自 朝廷而行法者實我公也公苟寬恩使

彼立功自必奮勇鼓勵以一當百各爲懇請琅見諸總鎮懇  
懇求保卽曰姑看諸鎮情面暫且記過倘仍前觀望兩罪俱  
發決不宥恕英等拜謝琅令釋其縛諸將叩首起琅復面諭  
用命苟不竭力悔之莫及吳英獻策曰國軒所恃者不過數  
隻煩船而已我們船隻可分開列陣不必齊進當用五梅花  
破之琅曰何謂五梅花英曰彼船少我舟多以五船結一隊  
攻彼一隻其不結隊者爲遊兵或爲奇兵或爲援兵悉遠駕  
觀望相機而應則無成艖冲撞之患又可以各盡其能奮勇  
破敵琅大悅曰據公妙論破之必矣先以三疊浪而進變以  
五梅花諸鎮將應諾遂各回船

卷二十七終

臺灣外記卷之二十八

江勝邱輝雙盡節

國軒良驥遁臺灣

康熙二十二年癸亥六月十八日琅與吳英等坐快哨從虎  
井過桶盤嶼遙觀賊城各處炮臺竝賊船灣泊安所未時回  
艖十九日琅又帶羅士珍張勝何應元曾成等各坐趕縉船  
從澎湖外汛由內塹細察形勢邱輝江勝見琅船在外颺駛  
亦卽浮棹起頭帆琅望見賊船搖動立即轉舵放炮收諸船  
回艖二十二十一兩日琅再申軍令各船將所配坐鎮將  
營備以及隨征千把等官姓名大書帆上以便遙觀知其進  
退二十二日琅命隨征都督陳蟒魏明副將鄭元堂同領趕

求無不獲齋

船雙帆艍船共五十隻爲一股從東畔時內直入鷄籠山四角山爲奇兵夾攻又令隨征總兵董義康王同外委守備洪天錫等領赴船雙帆艍船共計五十隻爲一股從西畔內塹直入牛心澳作疑兵牽制又將大鳥船五十六隻分爲八股每股七隻各作三疊琅自居中以便調度爲一股同安總兵吳英領一股居左平陽總兵朱天貴領一股居右金門總兵陳龍領一股居次左提標後營遊擊曾成同提標遊擊何應元合領一股爲次左之右銅山總兵陳昌同提標中營參將羅士珍合領一股居次左之左海壇總兵林賢領一股居末右廈門總兵楊嘉瑞領一股居末左其餘八十隻分爲二大

股以爲後援直從娘媽宮前而進國軒聞外塹山頂瞭望炮連發立即掌號各船齊起帆旋發炮吶喊從媽祖宮前而出迎戰互將斗頭煩交打飄颻攻擊朱天貴站在尾樓上高叫曰親家汝看我現任總兵可棄邪歸正速來投誠

按天貴與林應是兒女姻家應與江勝與勝邱輝俱是

壻門親家故天貴云云

邱輝應曰天豈容汝此等背義之人漢令施炮直庫將左邊煩安好喝舵公轉舵順勢開打天貴不防被炮穿脅而死林賢在末右之右遙見天貴傷炮船潰遂衝鋒入援正逢劉國軒坐風之上督邱輝陳起明江勝蔡明王隆施廷林應張顯

林德莊起廖義陳政蕭武洪邦柱楊文炳黃良驥陳士勳等  
船環圍攻擊其火箭藥罐矢石炮火渾如雨點賢督衆環敵  
力戰逾時左臂貫甲連傷三箭將士死者傷者悉無完膚矢  
石藥炮咸盡無奈將船中鐵鍋打碎入炮以禦白分必死正  
在酣戰危急之際幸其中營遊擊許英左營遊擊吳輝右營  
遊擊江新同隨征遊擊施應元隨征遊擊紀功廳李廷彪

按元字乾長別號統齋泉之同安人後官四川建昌總  
兵彪武舉晉江人後官果北口總兵

遂從外攻救賢奮勇督擊內外夾攻忽蔡明船被攻沈碎而  
王隆船又被江新火罐擲過發火諸船方潰散國軒亦退賢

方合艤退殺賢斯役也琅親登其船視傷痕竝詢其力戰禦  
敵情由撫賢背曰今日得澎湖者公其魁也他日侯伯勳爵  
琅當讓之惜其旋師即逝贈太子少保世襲國軒見琅等今  
日戰陣諸船各用命爭先復令劉明督其右鎮尤俊龍驥左  
鎮莊用侍衛中鎮黃德右鎮蔡智驥登協蔡添領旗鎮林亮  
勇衛前鎮曾遂中提督總理陳國俊右武衛隨征二營梁麟  
水師二鎮前鋒鎮營李富左營張欽水師三鎮右營許瑞水  
師四鎮右營林耀折衝鎮左鎮左營陳勇右提督後鎮左營  
王受等戰船煩船趕繒船鳥船雙帆船合艤齊擊正遇在  
左吳英督一股舟師進英令總旗領黃登副領旗湯明

按登漳之漳浦人官粵東提督明亦漳浦人官至海壇  
總兵

在船頭已在尾樓督戰力敵明身中數箭而英被鹿銃飛過  
右耳爲火氣傷裂負痛死敵忽船又被潮退擱淺衆咸慌焉  
登等喝無恐急拔木超連超數超乘微風船方逐浪移流而  
邱輝江勝合諸船亦至鋒勢愈銳琅見急揮羅士珍曾成何  
應元陳昌等暨浯嶼營遊擊王朝俊閩安協副將蔣懋勳海  
澄營副將林葵烽火營遊擊王祚昌江東協副將詹六奇平  
海營遊擊李全信海澄城守左營遊擊卓策合陳龍楊嘉瑞  
銅山鎮右營遊擊阮欽左營遊擊曾春龍江東守備韓進中

灌口營守備黃富海壇中營守備李琦提標中營千總林顯  
達提標左營千總胡泮後營守備戴名芳督標左營參將林  
寶海壇鎮中營遊擊許英提標右營守備方卻金門鎮中營  
遊擊許應麟金門鎮右營守備林芳督標左營署守備千總  
葛永芳提標右營千總鄧高海壇標右營千總林正春提標  
前營千總林鵬千總蔡琦鳳圍頭遊擊陳義隨征加功守備  
李光琅隨征左都督何義二侍衛吳啓爵隨征遊擊施世驤  
隨征外委守備陳玉路隨征副將黃昌都司黃勇外委守備  
施世驤隨征參將許光遠陳致遠隨征遊擊方鳳外委守備  
施世驤隨征副將湯貴隨征參將鄭雲外委守備施世忠隨

征參將洪雲隨征遊擊廖程外委守備施世驤隨征副將林元應外委守備施世輔李雲隨征參將鄭英金門鎮左營遊擊曾榮廈門鎮右營遊擊陳蘭廈門鎮左營遊擊朱明等合攻炮如雨下烟焰蔽天諸船各奮勇圍擊忽同安城守右營遊擊趙印試被江勝一炮碎腦而死勝亦被眾環圍傷死者半勝見勢危難以脫遁恐遭擒將兩邊大炮齊發登時沈沒

按懋勳浙江人官温州總兵蔡漳之漳浦人官至鶴麗總兵泮泉之惠安人官浙江温州總兵寶漳之詔安人官河北總兵芳江南人官至粵東黃岡副將爵粵之潮州海洋人六奇第四子官天津總兵駱字逸圓泉之南

安人係琅第五子陝西榆林總兵王路漳州人中浙江武進士官湖廣副將勇漳之詔安人本姓沈官粵東順德總兵驃字怡園琅之第六子官歷閩粵提督雲官潼關參將程漳之詔安人字希南官定海鎮中營遊擊明興化人官南澳總兵

按凡水戰彼此望見即發斗頭煩將近或發左邊炮轉舵發尾送炮止發右邊炮不敢兩邊各發如緊急左右齊發則船隨即沈沒矣

其陳立林順陳政黃國助莊用施廷薛衡林德張顯廖義楊文炳陳士勳洪邦柱等船成師果以五船合圍一隻或被火

罐所燒或被炮擊沈不可勝計惟邱輝一船往來接應揮炮亂擊其勢雄勇而江新曾成陳義施世標黃勇許英李光琅等合攻輝抖束精神船中跳舞督其左右拋擲火桶火箭矢石以禦忽左右足俱爲炮傷負痛死戰迨見勢迫遂自拋火於官艙藥桶齊發焚死國軒率曾瑞黃德尤俊林亮吳福吳遜陳陞陳國俊梁麟李富林欽林耀陳勇王受諸船橫攻直擊往來死併然琅有令在先遇賊船一隻卽會數隻合攻又連打沈曾瑞黃德吳遜吳福王受等船琅復催齊進軒見諸軍喪沒七八欲乘勢冲出遁去我師船隻如葉塞滿各港卽插翅難飛惟吼門一港無船堵截軒合黃良驥洪邦柱林應

尤俊林亮等殘敗船隻順流而退終爲死地乃謂舵公楊福曰急走吼門福曰吼門礁綫甚多從無船隻敢過軒情急免胄跪於戰棚上禱曰國軒今日奉命守禦澎湖師敗不得脫欲從吼門而出果天命有在國軒壽數當終船過立礙無線登時沈沒如有後福乞皇天假我潮水俾軒得以東歸視畢喝舵工從吼門出福見追兵將近勢在危急隨勒舵向吼門行果水漲風順無礙餘船踪悉尾後遁臺灣琅望而奇之令陳蟒率快哨追擒蟒港路不熟趕弗及遂率衆回師時日將西鳴金收軍打旗招降竝撥小哨沿海撈救跳水未死之賊其守娘媽宮炮城者乃將軍果毅中鎮楊德遊兵鎮陳明中



提督前鎮黃球右先鋒鎮領兵李錫遊兵鎮前營薛勇中軍  
施展前鋒黃茂遊兵鎮左營劉斌提督後鎮領兵徐其昌等  
以孤島無援遂各卸甲投戈出海請降琅望見即令杉板差  
官持令箭上山招降雜髮並造報花名冊呈繳又差官坐快  
哨各持令箭分撫諸島其守外塹果毅後鎮吳祿右鎮林韜  
中軍嚴澤親隨營阮恢管理大炮衝鋒營林武中提督右鎮  
右營蔡穆等暨守內塹侍衛後鎮顏國祥果毅右鎮左營林  
新遊兵鎮中營周烈管理大炮衝鎮營吳陞守四角山壁衝  
鎮楊章桶盤嶼果毅中鎮領兵曾勝以及守風櫃尾果毅後  
鎮左營林和內時果毅後鎮領兵洪陞鐵線尾征營徐秋將

軍澳果毅左鎮右營邱膚等各暨降旗獨有守把西嶼頭戎  
旗二鎮吳潛遙望衆師已敗欲率神威營林光管理大炮衝  
鋒營李德等下救又苦無舟楫惟督諸炮手發炮亂打虛作  
聲勢而已及見國軒退從吼門遁去滿港悉係施琅船隻嘆  
曰若聽江勝邱輝之言亦不致有今日時李德勸曰事既如  
此莫非天意潛曰余不恨事之不濟恨大丈夫不能死於疆  
場耳德曰諸島悉降此處難守速當爲計潛曰大丈夫既不  
能爲國驅馳豈可偷生苟活遂拔劍自刎德率其衆降於是  
三十六島咸歸順焉琅大悅悉令雜髮造報偽鎮將共一百  
六十五人賞以袍帽偽兵四千八百五十三名給以銀米出

示安民卽飛報澎湖大捷於督撫琅繕疏露布遣吳啓爵齎馳進京正值八月十五日

聖祖大悅遂解所御之衣 賜琅又御書於卷一軸曰

海氛之不靖朕心恆惻惻焉邇者滇黔隴蜀湖湘百獲之利咸失其業朕心恆惻惻焉邇者滇黔隴蜀湖湘百粵悉底救寧最爾臺灣險阻負固爾施琅銜命徂征決策進取樓船所指將士一心遂克島門逼其營窟勇以奪其氣誠以致其歸捷書到闕時值中秋對此佳辰欣聞凱奏念瀛壖赤子獲登衽席用紆南顧之憂惟爾丕績卽解是日所御之衣馳 賜再褒以詩曰

島嶼全軍入滄海一戰收降帆來蜃市露布徹龍樓上將能宣力奇功本代謀伏波名共美南北盡安流

吳啓爵齎回以 賜另 賜吳啓爵 御衣又授琅爲靖海

將軍晉封靖海侯世襲罔替余曾於甲子冬欲觀新闢之地桴海過灣舟次澎湖登其地偶成一律曰

烟霞蕩漾漁人處已作霸圖保障關退守聚成雄海國進窺覺隙動華山百千萬事成空壯三十六峰險亦閑南顧將軍誠有賴德流教化迨荒蠻

康熙二十二年六月二十二日劉國軒等幸脫出吼門至二十四日午刻到臺灣見鄭克塽馮錫范陳繩武洪磊等陳其

喪敗倚由臺灣兵民聞知各懷戒心市井風鶴錫范卽馳令守鹿耳門鎮將嚴加謹防又諭禁不許兵民越出村落大會文武相議戰守之策建威中鎮黃良驥曰今日澎湖失守臺灣勢危不如將大小戰船暨洋船配載眷口兵士從此山邊直下取呂宋爲基業提督中鎮洪邦柱挺身向前曰建威中鎮所言取呂宋者誠當柱與良驥願領爲先鋒埭猶豫未決錫范曰以全師取呂宋亦易事但不知民人土地如何中書舍人鄭德瀟曰議取呂宋以避鋒銳此策甚妙有地圖在此竝陳可取事宜畧曰

呂宋者南海之外國也橫亘數千里當中國丙離之位

山川綺麗中包巨湖四序溫燠盛夏南風發則微涼田禾四時皆可種亦產木棉其水土和甘人民白皙百姓繁生不亞中國從閩廣舟行七十二更順南北風來往僅七日程耳前代不載王會圖至萬曆三年國王遣其臣隔老察朝賀上嘉納之閩廣人數貿易其地云山有金亦未曾見惟有大小銀錢亦佛郎機酋從其祖家于系臘載以來用也

按佛都機在西南于系臘在東北其用大小銀錢最小者四分半次者九分又大者一錢八分三錢六分者名曰中錢七錢二分者名曰大錢以中錢爲一個用不論

大小輕重

其人猫眼鷹準拳髮赤鬚諸國中之最桀黠者四海行  
買不至則己至則圖謀人國呂宋亦其陰謀併奪焉  
按佛郎機人得利互市遂奉黃金王壽向王乞地得一  
牛皮大王許之佛郎機酋陰截牛皮細條相連圈圍已  
逾百丈王有難色但業許之佛郎機酋立將其地築城  
城內置樓臺城上列大炮後殺王兄弟併其國  
用巴禮僧天主教稱天曰寥氏用其術而鼓煽四方名  
爲化人日本國曾受其害至今國人深惡絕之漳泉逐  
利之夫多往焉城外仍廬舍置市名曰間貪色輩亦娶

妻置產雖生子不許讀中國書禁鐵器無深閨高閣三  
五載借事殺唐人名曰洗街恐其大盛生事也平時毆  
詈不敢回手殺傷從無抵償諸島中惟呂宋待我中國  
人最無禮先王在日每欲征之以雪我中國人之恨因  
開創無暇至世藩業已興師因接耿藩之變遂移兵過  
廈細查其衆不過千有餘人所恃者城上數門大煩而  
已然佛郎機之得國非有信義守國又無材武徒藉巴  
禮僧廣設禮拜寺七日一會男女自赴燃燭羅拜凡七  
日內所行事及陰私必告不告則瞞寥氏罪在不赦告  
之則爲懺悔名曰解罪初入其教誘以銀錢人將死其

地者有子則請巴禮僧當面開數財產半入寥氏無子則盡沒入禮拜寺耕植雖不徵賦稅而每丁月有崇例是憑無稽之梵俱罔愚蠢之生靈役使如牛馬斬艾如蓬蒿竊據玆土已百四十餘年成漳泉人積骸其地者何啻數十萬羈魂厲魄痛恨何極夫積怨者神人所共憤而叢貨者興盛所取資也呂宋初無重寶故不炫於外國自干系臘船銀至而後貿販富饒甲諸國今之積於公班巴禮者數十百萬是皆昔所誘惑貪愚死而括藏之物天下安有久積而不散虐侮而不復之理乎又安知非天之鑄其藏以待興王之採取也哉觀天運白

北而南漸啓文明之象稽古聖威武四方有截海外之權欲建非常之功當與非常之人謀之昔司馬錯張儀爭論秦惠王前張儀欲攻韓司馬錯欲伐蜀謂富國務廣其地強兵務富其民王者務富其德三者備而王隨之矣原夫秦之所以雄諸侯由司馬錯之計得之愚謂今日時勢有似於此故以議取呂宋爲上策

錫范閱其圖及其條陳大悅曰公何畱心之細且詳也即啓克塽令鄭明同黃良驥洪邦柱姚玉等領前隊爲先鋒其餘船隻分配眷口陸續而行何祐守淡水接二十二日失澎湖之報密遣其子何士隆從淡水港坐船往澎湖軍前納欵獻

臺不俟克塽令悉徹所統師回其林亮董騰蔡添等亦密與偵者通謀請琅速攻臺灣願為內應

卷二十八終

臺灣外記卷之二十九

武平伯力勸歸清

寧靜王一門殉烈

閏六月初四日馮錫范與諸鎮商議欲往征呂宋兵弁遂恃強橫為訛言四起當大搶掠而去是以百姓驚惶晝夜不安國軒聞知向范曰欲攻呂宋雖是良策可行於澎湖未失之前今澎湖已失人心懷疑苟輜重在船一旦兵弁利其所有而反日尊公之前車可鑑也

按范父澄世于甲申年在銅山欲過臺其僕利其財遂與諸船眾謀殺澄世投誠

范曰如此奈何應分兵死守軒曰眾志瓦解守亦實難不如

舉全地版圖以降量

清朝恩寬必先赦宥論未定忽琅遣國軒原副三坐營曾蜚前來招撫許保題軒現任總兵軒意遂決啓克塽命禮官鄭平英等詣澎湖軍前納欵范撓其事者再軒讓之曰昔者張卞二使至島議撫則議不稱臣以致兩島流離今春黃朝用至臺再撫則議不削髮又致澎湖喪師皆係公之操持不定當此之際尙且狐疑尙一朝變起蕭牆將奈何從來識時務者爲豪傑大事已去速當順天錫范無以答軒啓塽立謁鄭明等登岸撥兵監守鄭氏子孫恐其漏脫遺禍卽令鄭德瀾修進降表曰

延平王佩招討大將軍印臣鄭克塽謹

奏論域中有常尊歷代紹百王爲得統知天意有攸屬

興朝宅九土以受符誠五德之推移爲萬彙所瞻仰伏念

先世自矢愚忠追懷前代之恩未沾

盛朝之澤是以臣祖成功軍路以闢東土臣父經秣餉而

雜文身寧敢負固重險自擬夜郎以保全遺黎孤棲海

角而已茲蓋伏遇

皇帝陛下

高覆厚載 仁育義懷底定中邦如旭日升而普照掃擴

六宇雖浮雲翳而乍消苟修文德以來遠人寧事勝心而

焚海內乃者舳艫西下自揣履踏之獲愆念此血氣東成  
無非霜露之所隊顏行何敢再逆革心以表後誠也昔者  
威未見 德無怪鳥駭于虞機今者悟己知迷敢後麟遊  
於 仁圃伏願視天地民物爲一體合象胥寄棘于大同  
遠柔而邇寧形民因無心於醉飽貳討而服舍依漁自適  
性于淵泓夫且問黃耆之海波豈特誓丹誠以皦日己哉  
臣無任瞻

天仰聖激切屏營之至謹奉表稱進以 聞

又修書與施琅曰

側聞大將軍擅蓋世之名久矣愚曹無從攀仰遠避外荒

株守先祀初未嘗妄生釁端不虞樓船迅烈震我門庭僕  
知過矣卽不敢祈將軍之深爲布護獨不爲桑梓生靈繫  
念耶順 天之命謹奉 國制而遵 勅諭永爲屏

翰蓋東寧遠在淡荒若服而舍之使守先祀猶足以昭大  
同而靖南徼茲遣協理禮官鄭平英賓客司林維榮齋表  
赴轅門祈鑑眞誠奏達

宸聰倘邀 俞眷寶荷大德更有不逮惟祈指南臨楮曷勝

翹瞻

劉國軒亦致書與琅曰

澎湖之捷已知



天意有在矣敝員曾蜚荷恩釋回誦老親臺盛德諄諄爲萬靈造福感念不淺今藩主不憚屈折繕表以成鴻勳老親臺標名銅柱其立威甚遠而持心甚厚此又伏波所不逮也茲崙員以聽提命其中欵曲有未合節煩爲指示尤所厚望臨楮無任依馳

初八日卽差鄭平英林維榮齎降表暨與琅書劉國軒差朱紹熙曾蜚同行坐雙帆艍船二隻過澎湖見琅欲削髮稱臣仍居臺灣永爲

朝廷屏翰琅曰此議若澎湖未戰之先傾心向化本軍門自當與督撫合疏題請今門戶已破勢窮事逼始著爾等前來求撫明係詭譎非出真誠况本軍門奉

命專征進剿汝主果有真心當令劉武平馮忠誠二人親詣軍前將臺灣人民土地悉入版圖候

旨定奪如有別議惟有誓師而已卽將鄭平英林維榮咨送督撫立遣曾蜚朱紹熙二人仍回臺灣傳諭遂上疏曰

爲僞藩專差齎書求撫據情具題仰祈

睿鑑事竊照臣奉命專征整頓舟師于六月十六至二十一日在澎湖連日與賊鏖戰炮火雨點仰賴

皇上威靈官兵用命渠鎮賊夥俱被焚殺殆盡遂克取澎湖三十六島業于六月二十六日繕疏恭報外擬乘勝長驅

搗入臺灣如摧枯拉朽惟大小戰船被炮打損破壞甚多  
臣姑將次號之船可以補葺者載送炮傷官兵回廈調理  
將船整固令其順載柴米火藥弓矢前來澎湖以急軍需  
至打壞烏船見泊澎湖卽當用工修葺所需木料油灰釘  
鐵棕麻等項匠作各項爲數不小刻在要需誠難稍緩臣  
治師遠島祇恐呼應不靈隨于閏六月初三初六等日移  
咨督臣亟行採備仍備八槳船料一百隻一竝檄委漳州  
海防同知王錫九督運解到澎湖以應整葺製造用濟我  
師到臺灣穿淺入港渡載官兵登岸之用至于臣標水陸  
鎮營被炮傷死官兵三百餘員名煩傷一千八百餘員名

陣傷之兵雖給資醫治未能痊可荷戈臣計進剿臺灣之  
時宜畱大鳥船二十隻趕繪雙帆艍船三十隻共五十隻  
應用官兵四千員名畱守屯劄澎湖以爲兩頭聲援策應  
然新附投誠兵衆未便遽用而征兵不足禦剿乏人業併  
移咨督臣選調精壯陸師官兵四千員名前來補用聽命  
調遣去後臣雖殫力疾呼尤慮汪洋風濤遠隔實爲獨力  
難支惟分撥船兵在于八罩將軍澳南大嶼東西甘吉龍  
門港吼門吉貝嶼等島倍加巡瞭以扼其吭乃殘孽收遁  
之餘見臣水陸官兵逼臨門庭安插投誠撫綏地方民人  
樂業鷄犬不驚臺灣兵民間之俱各解體此閏六月初八

日偽藩鄭克塽巨魁劉國軒差偽禮官鄭平英偽賓客司林維榮偽員曾蜚朱紹熙等齎具降表一道於與臣書二封另致督臣書二封駕趕總雙帆船二隻到澎湖臣軍前納款請降待

命惟馮錫范與鄭克塽欲求原居臺灣承祀祖先照管物業懇臣指示臣思此議未妥若在未進師撲剿之時逆孽早遣來降當爲題請今澎湖既得窮逼之際始差鄭平英等前來求撫明係詭譎緩兵之計難以遽信臣任專征正宜主剿不宜議撫將鄭平英林維榮二員並帶二封咨送督臣看守候

旨定奪查鄭克塽年尚幼稚未諳大禮操縱指揮權皆出于劉國軒馮錫范二人茲特令曾蜚朱紹熙回臺灣傳諭若果真心投誠必須國軒錫范二人來臣軍前面降將人民土地悉入版圖其偽官兵尊

朝廷安輯若偽藩等悉如臣言臣當體

皇上好生之德以拯數十萬之生靈具疏題請我

皇上赦其前罪畀之新恩勅行督撫二臣撫綏安插臣因船隻被炮擊壞暫在整葺未得乘勝搗剿其所要需船料匠作俟解到卽晝夜兼工整造若船隻修備風信稍利殘孽不從臣之議卽督師進發當此國軒一戰敗遁魂落魄喪

臺灣人民風鶴艸木皆兵之際無難殄滅淨盡根株以慰宸衷謹將偽藩鄭克塽原具降表及鄭克塽劉國軒致臣原書進上

御覽恭聽 睿裁迅賜

勅旨其鄭克塽所致臣書茫然折閱乃臣之罪緣係恭報偽藩求撫事宜貼黃難盡伏乞

皇上全覽施行爲此具本謹密題請 旨

十六日曾蜚朱紹熙二人回帆到臺灣見塽國軒錫范備述琅言有如一依惟當誓師決戰塽茫然而范躊躇七月初五日軒啓塽曰人心風鶴守則有變士卒瘡痍戰則難料當請

降聽天勿貽後悔塽從之令鄭德瀟再修降表曰

延平王佩招討大將軍印臣鄭克塽謹 奏爲舉國內附仰冀

聖恩事竊臣生自海邦稚懵無識謬繼創垂之緒有乖傾向之誠邇者樓船西來旌旗東指篋壺緩迎於周旅干羽煩舞於虞階自省重愆誠爲莫贖然思

皇靈之赫濯信知 天命有攸歸逆者亡順者昌乃 覆載待物之廣大貳而討服而舍諒

聖王與人之甚寬用遵往時之成命爰邀此日殊恩冀守宗祧以勿失永作屏翰於東方業有降表具

奏外及接提督臣施琅來書以復居故土不敢主張臣思既  
傾心而向化何難納土以輸誠茲特繕具表章竝延平王  
印一顆冊一副及武平侯臣劉國軒印一顆忠誠伯臣馮  
錫范印一顆敬遣劉國昌馮錫圭齎赴軍前繳 奏版籍  
土地人民待

命境上數千里之封疆悉歸土宇百餘萬之戶口竝屬版圖  
遵海而南永息波濤之警普天之下均沾雨露之濡實  
聖德之漸被無方斯遐區之襁負恐後獨念臣全家骨肉強  
半孺呱本係南人不諳北土合情乞就延閩地方撥  
賜田園廬屋俾免流移之苦且養贍有資則蒙

高厚之生成當銜丹青以銜結至於明室宗親格外優待通  
邦士庶軫念綏柔文武諸官加

恩遷擢前附將領一體垂仁夙昔結怨盡與捐除籍沒產業  
俱行 賜復尤當廣推寬大之仁明布維新之令使夫羣  
情允愜共鼓舞於春風萬彙熙恬同泳游於化日斯誠微  
臣無厭之請微望

朝廷不次之恩者也爲此激切具本奏

聞伏候 勅旨

十一日差錫范胞弟兵官馮錫圭工官陳夢煒國軒之弟國  
昌錫范又遣其胞弟錫韓同曾蜚朱紹熙坐趕繒船再到澎

湖時有寧靖王朱術桂字天球原分封荊州因避張獻忠亂入閩依成功迨至癸卯年十月兩島俱破又從鄭經之銅山繼而渡臺建府於府西赤嵌城傍人品雄偉美髯弘聲善書翰喜佩劍潛沈寡言勇敢無驕鄭氏將帥以及兵民咸尊敬之迨聞澎湖敗績仰天嘆曰主幼臣強將驕兵悍又逢此荒亂是天時地利人事三者咸失將來托足正不知在於何處迨至議降復嘆曰是吾歸報高皇之日遂將所有產業悉分賞其所耕佃戶所居之府舍與釋氏爲利供佛

按後琅抵臺設天后宮前祀天后後奉佛祖旁祀王護法其元配羅氏早逝惟有侍姬袁氏蔡氏荷姑梅姊秀姑五人

而已術桂諭五人聽其自擇配袁氏蔡氏同請曰妾等侍殿下有年殿下既毅然盡忠妾雖婦人頗知大義亦願盡節相隨殿下豈易念失志乎荷姑梅姊秀姑亦不肯再事他人術桂奇之曰汝等莫非矯言作一時之雅觀五姬齊聲曰殿下如不信願先死殿下前九泉相待桂大喜卽各制新衣以候十一早見馮錫圭等齋降表出鹿耳門卽對五姬曰是死日矣備棺六各沐浴更衣設席環坐歡飲飲畢五姬向桂叩首曰妾等先死以候殿下起而自縊桂各爲放下收殮虛一棺以自待冠服乘輿出與鄭克塽國軒錫范繩武洪磊等諸當事言別又與左右鄰老辭遂大開門戶命僧人守候遂望北

叩首二祖列宗起又向東拜謝父母畢援筆書曰

余自壬午流賊破荊州攜家南下甲申避亂閩海總爲幾根頭髮保全遺體遠潛外國今已四十餘年歲六十有二時逢大難全髮冠裳歸報高皇生事畢矣無忤無愧又題一絕云艱辛避海外總爲幾莖髮於今事已畢祖宗應容納

宣宗九世孫術桂書

書畢鄭克塽率劉國軒馮錫范洪磊陳繩武等咸至桂延入謂克塽曰承令先祖先尊之庇有年茲非桂輕爾言別奈天寬海闊無可托足不得回報高皇列聖之在天克塽與國軒等惟咨嗟耳桂又謝曰有勞相送卽與塽等作揖投環顏

色如故塽命禮官鄭斌竝所囑僧人收殮越十日擬與原配羅氏竝殉節袁氏蔡氏荷姑梅姊秀姑葬於門滬今鳳山縣長里地方斌以其地窄將袁蔡五人別葬於大林今臺灣縣仁和里地方通國聞之悉咨嗟嘆息先是初十日夜有星如斗殞於東南方十五日琅在澎湖修葺船隻以便進剿忽報馮錫圭等船齎降表竝書至而何士隆亦到琅細詰情由知其眞誠無僞十六日遣侍衛吳啓爵筆帖式常在同馮錫圭陳夢煒曾蜚朱紹熙帶告示往臺灣曉諭僞官兵民等遵制削髮竝令其齎繳印勅示曰

爲安撫輸誠文武官員兵民以廣

聖恩事照得

聖朝定鼎以來法素從寬恆惟厚撫順剿逆區宇咸寧臺灣未靖本提督奉

旨專征蓋欲拯絕島之生靈俾海疆於奠安茲偽延平王及武平侯識天意之有在樂

皇仁之無偏遣協理兵工二官副使二員齎具表章勅印前來歸命土地人民悉入版圖本提督體

朝廷好生之德念至誠求撫之心現為題請仰邀

浩蕩洪慈安輯咸宜合就曉諭為此示仰臺灣地方軍兵士庶等知悉示到各兵民立即削髮本提督刻日親臨安插

軍紀素嚴秋毫無犯今既革心歸誠官則不失爵秩之界民則皆獲綏輯之安兵丁入伍歸農聽從其便各自安生樂業無事徬徨驚心

俞旨下頒新恩遍及本提督言出金石決不爾負須至示者琅即題報臺灣就撫疏曰

題為恭報臺灣就撫事宜仰祈

睿鑑事竊照澎湖克捷海逆已失其險康熙二十二年閏六月初八日偽藩鄭克塽渠魁劉國軒差偽官鄭平英林維榮曾蜚朱紹熙等齎送降表並書來澎湖軍前求撫臣慮其詭譎緩兵難以遽信遂令曾蜚朱紹熙回臺灣傳諭若



果真心投誠必須劉國軒馮錫范來臣軍前面降將民人土地悉入版圖其僞官兵遵制削髮移入內地悉聽

朝廷安輯若僞藩等悉如臣言臣當體

皇上好生之德以拯四海之生靈題請赦其前罪撫綏安

輯業於閏六月十一日將降表並書具疏進上

御覽在案竝七月十五日鄭克塽復差僞兵官馮錫圭僞工官陳夢煒劉國軒遣胞弟僞副使劉國昌馮錫范遣胞弟僞副使馮錫韓同曾蜚朱紹熙齎送降本稟前來澎湖軍前回話一一依臣前言其防守南北淡水僞左武衛將軍何祐僞左先鋒鎮李茂等所帶賊衆今俱弔回臺灣南北

淡水已無防守矣何祐等差齎密稟到臣納款是臺灣南北地方俱已效順又據曾蜚等稟稱鄭克塽劉國軒及兵民人等咸懇臣發給示張諭削髮俾得遵依早發一日則民早獲一日之安臣因仰體

浩蕩洪慈服舍來安乃敢給示撫綏矧鄭逆自來遠阻聲教未被

聖化非如吳耿諸逆受恩背叛者比諒荷

皇上廣開面網赦其前非俾沾德意即將劉國昌馮錫韓見畱軍前隨于十六日遣侍衛吳啓爵六品筆帖式常在同馮錫圭陳夢煒曾蜚朱紹熙帶安插告示五張先往臺灣

曉諭驗看各僞官兵民等削髮令其催齎僞藩鄭克塽劉國軒馮錫范等勅印並繕謄降本前來交繳以便臣代爲齎進則此事似可妥當也臣俟各船修葺齊備一面統率船兵親抵臺灣看其形勢暫行安輯其所議造八槳船隻及再調陸師官兵已移咨督臣停止矣第查臺灣土地千餘里戶口數十萬地在復海之表或去或留僞官兵戶口繁多當作何安輯事關重大所當亟請

皇上迅賜睿裁勅差才能戶兵二部迅速前來會同督撫主裁料理安置得宜畢此大事俾臣得卽勾當班師從此金甌永固玉燭常調可無厯南顧矣此番澎湖克捷臺灣就

撫實賴

皇上洪福齊天威靈遠暨乃克見成效但臣鹵莽武夫性質愚戇直道行事不肯遺賊以爲

君父憂荷蒙

皇上參養之恩特加之遇無足稱報誓必掃靖海氛少効涓埃耳今臣年逾六十筋力衰邁難勝封疆大任但孤忠獨立既不肯苟合又不能彌縫征剿臺灣之舉乃面奉諄諄諭旨專征是以臣竭力死効堅不可狗務期蕩平極知深拂人意災必逮身竝賊島旣平臣職已盡早不引退將來必爲禍階伏乞

皇上恩賜召臣回京俾得時觀

天顏臣所深願也謹將偽藩抄來疏稟恭進

御覽緣係恭報臺灣就撫事宜貼黃難盡伏乞

皇上全覽乾斷迅賜

勅旨施行爲此具本謹密題請

旨

十九日吳啓爵同馮錫圭到臺灣鄭克塽率劉國軒馮錫范等文武齊集海墘迎接相見各致意外啓爵曰諸公識時順天我

皇上寬仁大德自當高爵厚祿以爲 國家柱石且提督誓

爲安輯得宜保舉重用決無負諸公之一片真誠歸順也遂出提督告示五張遞與克塽交國軒通衢傳掛于二十二日克塽令兵民悉遵 制削髮塽與國軒等諸文武官候面琅削髮姚啓聖於六月十四日在銅山送施琅出師隨回漳州越三日往福州甫至南臺卽接澎湖大捷之報頓足曰皆林寶之誤我也

按寶原海上宿將啓聖題爲左營凡平海事悉以詢之當欲出師先啓聖問寶欲與琅同去寶以六月颶風不測澎湖山嶼低矮難收故啓聖中止

迨至鄭于英等至省城見啓聖請願就撫聖大悅與巡撫金

鉉計議檄參將洪範同傳宣楊俊功齋咨文到澎湖與琅將督標左營參將林寶所帶官兵配坐船隻悉行弔回又差候選同知林昇同撫標官頭鄭瑞生遊擊孫熙駕船二隻從福州港放洋直過奈南風頂頭延至二十日申刻方到臺灣而鄭克塽已令兵民於是日向午剃頭矣克塽國軒亦厚待督撫各使二十七日塽差馮錫圭陳夢煒吳啓爵常在齋降本竝繳延平王冊一付金印一顆輔政公鄭聰印一顆及武平侯忠誠伯左武衛等印前到澎湖見琅琅細詢啓爵與常在在臺灣情形二人一一詳陳果兵民真誠無偽又備述督撫差林昇鄭瑞生孫熙三人于二十日到臺見兵民悉剃頭髮

矣各嗟嘆悔遲琅嘆曰均是爲

朝廷辦事何不通知而直往豈不貽笑于劉國軒乎從來大將不能成功于外者卽此可知也今臺灣得平實我

朝威靈與生民之福卽將齋到冊印咨移督院主稟轉繳又密囑啓爵常在曰日本軍門有一另疏汝等同劉國昌全省倘督院固執己見不肯代繳汝等卽將本疏速齋進京其疏曰爲恭報臺灣兵民削髮僞藩齋繳冊印事緣照僞藩鄭克塽差僞兵官馮錫圭工官陳夢煒劉國軒遣其胞弟副使國昌馮錫范遣其胞弟副使馮錫韓齋降本稟到澎湖軍前一悉聽臣言臣察其真誠向化於本年七月十六日

差侍衛吳啓爵筆帖式常在前往臺灣看驗偽兵官削髮業將情由併將偽藩本稟于七月二十四日具題繳報外此番偽藩差官求撫蓋因澎湖失險故革心歸誠臣就近差遣看驗剃髮無非畢此剿撫大事乃吳啓爵等于七月十九日到臺灣而督臣亦差候選同知林昇撫臣差官頭鄭瑞生遊擊孫熙駕船二隻于二十日到臺灣杳無到澎湖知會枉道直去臺灣懇其就撫是將軍國之事故作兩途岐視毋乃有輕

國體而貽笑於逆衆者乎且臣于閏六月二十一日因偽官鄭平英林惟榮到處張蓋乘轎自尊無忌咨移督臣有搖尾乞憐袒肉求降等語督臣所差之員將此公文於督臣白題疏稟抄送臺灣與偽藩等看閱致使賊衆危疑抱恨於臣其臺灣地方形勢兵民削髮安輯事宜應去應留頭緒多端不便繁入疏稟吳啓爵常在親履其地俱悉其情玆專差二員赴

闕披陳面奏本月二十七日偽藩鄭克塽復差馮錫圭陳夢焯同吳啓爵常在齎具降本一道及繳延牛冊一副印一顆輔政公鄭聰印一顆武平侯劉國軒印一顆忠誠伯馮錫范印一顆左武衛將軍何祐印一顆偽藩鄭克塽擬將所繳印冊令偽副使劉國昌親齎進京臣卽令同吳啓爵

一齊登程其馮錫韓適值抱病不得就道臣畱在軍前因見督臣如此爭執是以得鄭克塽奏本一封冊一付印五顆發交吳啓爵常在送赴督臣衙門聽其主稟具 題齋繳去後倘督臣不爲代繳臣一面囑吳啓爵等卽行齋進臣當卽親臨臺灣先將要緊之人載入內地安插但僞官兵民戶口繁多仰祈

皇上迅差戶兵二部前來主裁料理得宜臣奉

命專征剿業已勾當仰候

俞旨以便班師其安插事宜悉交督臣自行料理鄭克塽尙有招討大將軍印一顆據稱有戶口兵馬各項冊籍俱未

攢造因暫畱用候繳合將僞藩鄭克塽所具兵民削髮奏本一道繳進

御覽其鄭克塽劉國軒馮錫范何祐等及文武大小各僞官俱在候

旨削髮緣係僞藩繳印事理貼黃難盡伏乞

皇上俯賜全覽竝祈

勅旨施行

劉國軒知督提二人各執己見不睦恐臺灣新附心懷危疑若有一二宵小從中鼓煽其咎誰歸一面差紅旗官巡輯密布提防一面遣曾蜚同何士隆過澎湖請琅速到臺灣彈壓

琅接軒書即整備船隻令何士隆曾蜚回覆鄭克塽劉國軒

預接

王師

卷二十九終

臺灣外記卷之三十

施將軍議留臺灣

大清國四海太平

八月初九日琅拜疏曰

題為恭報微臣先抵臺灣安輯仰祈

睿鑑事竊惟澎湖克捷臺灣求撫兵民俱已削髮臣業經前

後具疏齎繳偽藩鄭克塽降表進上

御覽應當候 旨欽奉遵行兼以出征官兵所需糧餉督臣

即于六月十一日回省悉皆臣撥船過洋來往載運發給

今各鎮營官兵秋季糧餉過四十餘日尙未運到故未得

前去臺灣如督標所撥付朱天貴官坐趕繒船雙帆艍船

于六月二十二夜內朱興卽帶一十三隻徑不請令私自  
逃回尙有五十一隻配載官兵二千二百五十六名督臣  
于閏六月十二日差參將洪範傳宣楊俊功齎咨文到澎  
湖守候盡行弔回矣茲本月初八日僞藩鄭克塽修書差  
副使何士隆同曾蜚齎送前來僞武平侯劉國軒僞忠誠  
伯馮錫范各致書一封到澎湖臣軍前稱說臺灣兵民數  
千萬恐人心危疑不一事久生端請臣速去安插臣立卽  
會議行間各鎮臣酌派各船畱守澎湖以爲接運糧糈之  
用臣統率水陸官兵船隻擬於十一日開駕前抵臺灣彈  
壓暫行安輯將要緊之人先卽載入內地仍移咨督撫或

親臨安插或酌委有司前來料理仰候

勅差戶兵部臣到時與督撫二臣商酌安插得宜臣到臺灣  
察閱人民土地情形另疏題報更有請者臣右眼自六月  
十六日衝擊賊船被銃打傷醫治至今兩月有餘猶昏昧  
未明勉強在軍調度剿撫之事勾當臣職已盡伏乞

諭旨准臣班師回汛謹治俯賜

睿裁施行爲此具本謹密題請 旨

十一日琅統吳英林賢陳昌楊嘉瑞陳龍等鎮協營守備配  
造船隻從澎湖開駕進發鄭克塽得何士隆曾蜚回信知琅  
將到仍差士隆同禮官鄭斌暨父老綵旗鼓樂坐小船出鹿



耳門迎接克塽率國軒錫范繩武洪磊何祐黃良驥等文武俱列隊竝番人民等齊集海墘恭迎王師琅等諸船因風輕微至十三日方到但鹿耳門港路紆迴自相撞衝觸壞船十有餘隻塽令何祐飛駕快哨引港祐正隨其轉灣處樹青爲號方進臺灣登岸劄營會克塽國軒等歡愛倍加禁止搔擾百姓士民安堵樂業農不易畝工不閉肆與國軒等談竟日夜各恨相見之勝隨分送克塽國軒等諸文武官員袍褂靴帽擇吉于十八日薙髮所有各社土番接踵而至皆悉賞其袍帽銀牌及烟布之類皆欣然踊躍安插已定遂恭報入臺灣日期疏曰

題爲恭報舟師已抵臺灣投誠官兵急需糧餉伏乞勅旨應給事緣照臣總統水陸官兵船隻于本年八月十一日自澎湖開駕進發業已題報在案其澎湖地方臣酌撥水陸官兵共三千員名大小船三十餘隻畱守山海防禦臣于本月十三日到臺灣鹿耳門僞藩鄭克塽遣小船前來接引入港僞侯劉國軒僞伯馮錫范率領各僞文武官員到軍前迎接急隨于本月十八日削髮臣逐一分發袍帽外套靴令副其各鄉社百姓以及土番壺漿迎師接踵而至臣宣布

皇仁酌量給賞銀牌袍帽靴烟布正悉歡欣踊躍其故明監

國魯王世子朱桓呈繳金冊一副同瀘溪王朱慈曠巴東王朱江樂安王朱俊舒城王朱著奉南王朱熹益王宗室朱錫等亦赴軍前投見詢稱寧靖王朱術桂聞大師克取澎湖即全家自縊而死臣就朱慈曠等追取各原受冊印據稱流落多年貪窳銷用見各住艸地耕種度活茲朱桓等宗室數人應載入內地移交督撫聽其主裁安插惟臣舟師今抵臺灣細閱港道紆迴地勢窄狹波濤湍息可謂至險至固臣雖用兵頗能籌度及此觀看周詳若非皇上威靈遠震未可力鬥取勝也顧輸誠向化之舉在各僞文武官員悉懷疑畏獨劉國軒決意傾心以生死聽命于

朝廷免貽生靈塗炭此其人毅然慷慨見機力主歸

命遂使我師不用戰攻而得全國其功不少倘荷

皇上寬恩授以爵秩當有可見効之才也又闢土地肥饒出

產五穀沃野千里人民土番雜處甚爲稠密應去應留臣

經具疏題請未奉

勅旨仰冀迅賜睿奪俾得欽奉遵行更有請者臺灣僞官兵

聽其歸農者甚多而入伍者亦不少當即暫給糧食以安

新附者之心若承交接管此項糧餉何從以應臣于本年

八月初八日承兵部劄付覆奉

諭旨其願入伍投誠兵丁著卽補經制缺額數內欽遵在案

第查此時額缺零星查補無幾再四籌維粵江浙四省  
溢設營兵蓋因臺灣負抗飄突靡常故增添堵禦今臺灣  
既平海外可以無患請就福建內地陸營先行酌量裁撤  
將所裁溢額之糧餉而暫給投誠之兵需可以無外費公  
帑亦移緩就急一時權宜策應之計也臣一面題請一面  
挪撥發給俟凱旋之日應撤應留以聽部議定奪臣見今  
出師臺灣船隻來往越過兩重海洋水程遼遠值茲秋冬  
北風盛發阻滯難行動經匝月不等非比春夏可以計期  
而至伏乞

皇上睿鑑迅飭部議或如臣所議裁汰或應就何項措給

勅下督撫著令作速遵行以應發給投誠兵需庶免懸空矣  
茲在臺灣如鹿耳門大港僚仔港馬沙港打狗港上下淡  
水等處俱已調撥船兵分布守禦臣帶水陸鎮營官兵一  
半登岸駐劄一半在船至僞藩鄭克塽僞侯伯劉國軒馮  
錫范等及各眷口應卽一併載入內地緣此時風勁浪狂  
舟楫難行容俟九月杪風浪稍平卽撥載移送督撫安插  
所有僞官印劄兵民戶口等項繁多一時彙造未得就緒  
俟其造明交繳到臣卽具疏齎進緣係恭報舟師已抵臺  
灣事理貼黃難盡伏乞

皇上俯賜全覽施行謹密題請 旨

二十二日施琅奉牲幣告祭成功之廟有曰

自南安侯入臺臺地始有居民逮賜姓啓土世爲巖疆莫  
可誰何今琅賴

天子威靈將帥之力克有茲土不辭滅國之誅所以忠

朝廷而報父兄之職也但琅起卒伍于賜姓有魚水之歡中

間微嫌釀成大戾琅于賜姓剪爲仇敵情猶臣主蘆中窮  
士義所不爲公義私恩如是而已祭畢淚下

二十三日琅率吳英國軒等蹈勘南北二路見其山川峭峻  
土地膏腴茂林修竹人烟輻輳且番民雜處耕種實海外之  
雄鎮若棄而不守則將來不但宵小竊據亦必爲紅毛所圖

其貽害地方又不僅吾閩一省自當請留以作邊海屏藩二  
十六日琅回二十八日卽將朱桓等諸宗室撥船載過廈門  
咨交督撫安插九月初一日國軒面琅請曰臺灣業已安平  
交公料理軒豈可久居于此以生外議宜單騎進京  
陛見生死付之

朝廷琅是之卽撥船與之初六日國軒辭克塽錫范等先渡  
海至省見啓聖馳驛進京琅一面發還各省難民又撥船護  
送鄭克塽馮錫范洪磊陳繩武劉國昌何祐林陞李茂等諸  
文武眷口過廈聽啓聖安插國軒至京 陛見

聖祖大悅卽授爲天津衛總兵迨鄭克塽馮錫范到京

陛見授克塽正黃旗漢軍公錫范正白旗漢軍伯琅見諸凡業已就緒遂將臺灣地方交吳英總統把守于十一月二十二日班師至澎湖巡視調理二十五日親祭陣亡諸將士二十六日開船是夜放洋二十七日午刻到廈門十二月初一日琅往福省與部堂蘇督撫會議臺灣棄留衆以留恐無益棄虞有害各議不一琅遂決意主留題疏曰

題爲表陳臺灣棄留之利害仰祈

睿裁事竊照臺灣地方北連吳會南接粵嶠延袤數千里山川峻峭港道紆迴乃江浙閩粵四省之左護隔離澎湖一大洋水路三更餘遙查明季設水澎標於金門所出汎至

澎湖而止水道亦有七更餘臺灣一地原爲化外土番雜處未入版圖也然其時中國之民潛至生聚于其間者已不下萬人鄭芝龍爲海寇時以爲巢穴及崇禎元年芝龍就撫將此地稅與紅毛爲互市之所紅毛遂聯絡土番撫納內地人民成一海外之國漸爲邊患至順治十八年爲海逆鄭成功所踞糾集亡命挾誘土番荼毒海疆窺伺南北侵犯江浙傳及其孫克塽四十餘年無時不仰墜宸衷日奉 旨征討親歷其地備見野沃土膏物產利溥耕桑竝耦漁鹽滋生滿山皆屬茂林值修竹硫磺水藤糟蔗鹿皮以及一切日用之需無所不有向之所少者布帛耳

茲則木棉盛出經織不乏且舟帆四達絲縷踵至飭禁雖嚴終難杜絕實肥饒之區險阻之域逆孽乃一旦凜

天威懷 聖德納土歸命此誠天以未闢之方興資

皇上東南之保障永絕邊患之禍豈人力所能致哉夫地方既入版圖土番人民皆屬赤子善後之計尤宜周詳此地若棄爲荒陬復置度外則今臺灣人居稠密戶口繁息農工商賈一行徙棄安土重遷失業流離殊費經營實非良策况以有限之土渡無限之民非閱數年難以報竣使渡載不盡苟且塞責則該地深山窮谷竄伏潛匿者實繁有徒和同土番從而嘯聚假以內地之逃軍閃民急則走險

糾黨爲崇造舟制器剽掠濱海此所謂藉寇兵而齎寇糧固昭然較著者甚至此地原爲紅毛聚處卽不貪涎亦必乘隙以圖一爲紅毛所有則彼性狡黠所到之處善能鼓惑人心重以夾板船隻精壯堅大從來海外所不敵未有土地可以托足尙無伎倆若再得此地數千里之膏腴附其依泊必倡合黨夥竊窺邊場逼近門庭乃種禍後來沿海諸省斷難晏然無虞之時復動師遠征兩涉大洋汪洋波不測恐未易再建成効如僅守澎湖而棄臺灣則孤懸海中土地單薄界于臺灣遠隔金廈豈不受制于彼而能一朝居哉是守臺灣則所以圖澎湖也臺灣一守兼之沿邊

水師汛防嚴密各相犄角聲氣關通應援易及可以寧息  
况昔日鄭逆之所以得負抗逋誅者以臺灣爲老巢以澎  
湖爲門戶四通八達游移肆虐任其所之我舟師往來有  
阻今地方旣爲我得在在官兵星羅碁布風期順利片帆  
可至雖有奸萌不敢復發臣業與部臣蘇撫臣金鎔等會  
議之中部臣撫臣以未履其地未敢造次臣閱歷周詳不  
敢遽議輕棄者也伏思

皇上建極以來仁風遐暢威聲遠播四海賓貢萬國咸寧日  
月所照霜露所墜凡有血氣莫不臣服以斯方拓之土奚  
難設守以爲東南之藩籬且海氛內地溢設之官兵盡可

陸續汰減以之分防臺灣澎湖兩處臺灣設總兵一員水  
師副將一員陸師參將二員兵八千名澎湖設水師副將  
一員兵二千名通共計兵一萬名足以固守又無添兵增  
餉之費其防守總兵副參遊等官定以三年或二年轉陞  
內地無致久任永爲成例在我

皇上優爵重祿推心置腹大小將弁誰不勉勵竭忠然當此  
地方初闢設地正賦雜餉殊宜蠲豁見在一萬之兵食權  
行全給三年後開徵可以佐需抑且寓兵于農亦能濟用  
可以減省無庸盡資內地之轉輸也蓋籌天下之形勢必  
求萬全臺灣雖屬外島實關四省之要害勿謂彼中耕種

尤能少資兵食固當議留卽爲不毛荒壤必藉內地輓轉運輸亦斷斷乎其不可棄惟棄留之際利害攸關恐有知而不言之愆如我

朝兵力比于前代何等強盛當時封疆大臣無經國遠猷矢志圖賊狃于目前之安惟計畫遷五省邊地以避寇患致勢愈熾而生民顛沛往事不臧近禍及今重遺

朝廷宵旰之憂臣仰荷

皇恩天高地厚行年六十有餘衰老浮生頻虞報稱末由熟審該地形勢而不敢不言蓋臣今日知而不言至後世萬一滋蔓難圖竊恐

皇上責臣以緘默之罪臣又焉所自道故當此地方削平定計去留莫敢擔承臣思棄之必釀成大禍留之誠永固邊疆因會議之際臣雖諄諄極道難盡其辭在部臣撫臣等耳目未經又不能悉其槩是臣於會議具疏之外不避冒瀆以其利害自行詳細披陳但事關

朝廷封疆重大棄留出自

乾斷外臺灣地圖一張附馬塘遞進

御覽緣係備陳臺灣去留事宜貼黃難盡伏乞

皇上睿鑑全覽施行

聖祖覽琅疏下部議議臺灣僞爲盛天府萬年州天興州今



改爲臺灣府轄三縣以附郭爲臺灣縣南路爲鳳山縣北路爲諸羅縣仍設道官一員兼轄廈門地方又在於一萬額制兵內撥出五百多名守備一員轄之爲道標其營制陞轉額設悉依施琅所議議上奉

旨依議遂收入版圖設置教化永爲海外文物富饒之邦矣

評 新闢天南海外方 人民安堵不須忙

曰 雨順風調昇平福 一統山河帝祚長

附紀廈門當於萬曆甲辰三月初十日雷震一石其文曰

艸雞夜鳴 長耳大尾 銜鼠干頭 拍水而起

殺人如麻 血成海水 揚眉於東 傾陷馬耳

生女滅雞 十倍相倚 志在四方 一人也爾

庚小熙皞 太平伊始

當時人多不解其意今事後方覺其草雞夜鳴長耳大尾湊來是鄭字應在鄭芝龍也銜鼠干頭天干之頭是甲銜鼠是子成功是甲子年生也拍水而起是應成功之踞金廈殺人如麻血成海水是應成功之征戰害民揚眉於東是應成功之踞臺灣傾陷馬耳是應馮字言馮錫范專權生女滅雞十倍相倚十倍爲兆生女合成姚字應在姚啓聖志在四方一人也爾合之爲施應施琅也庚小熙皞庚小爲庚字應在康熙癸亥年之平山海爲一而太平伊始實賴姚施二人之功

觀此可見沿海遭劫數十年者莫非天也人復何憾焉

卷三十終

附土音字說

以下九字

字典所無仍照原本刊刻故替之

艙音倉船中格堵也

艚音居居兵之雙帆船也

艚音宗船隊也

煩音降炮也

礁音焦水中凸石也

埔音浦山邊平地也

埕音呈土坡也

泖音兵洲名即濱字省

梃即鎮海中以沈木鎮舟


誤字

筈字誤作筈

琅字誤作瑯

按九卷黃梧薦施郎水務韜畧兼優郎即改名琅字貝  
勒將琅保題為同安副將原本誤作瑯至卷之二十五

始改正琅字



天保甲午

